

Cumprovar la habilitad da sittar

Per survegnir la patent a sto mintga catschadur contonscher in resultat da tir minimal

DA HANS HUONDER / ANR

■ **Catschaduras e catschadurs grischuns ston buca mo sittar en persunalmein la buis egl avegnir, els ston era contonscher in diembrer da puncts fixau. Cass cuntrari obtegnan els buca la patent.**

Quella novaziun entra in vigur uonn. Sco quei ch'il president dall'Uniun cantunala dils catschadurs da patent dil Grischun, *Robert Brunold*, ha detg sin damonda dall'Agentura da novitads rumantscha, ei quell'obligaziun vegnida decretada dil cussegl federal e vala per l'entira Svizra. La pretensiun da tir sco tala ei cumpareglia blia cun quella digl examen da catscha. Cun la buis da catsch'aulta sto il catschadur sittar quater siets in suenter l'auter il minimum el dad ogt, cun la buis da catscha bassa sto el tucchar la lieur rullonta medemamein quater ga ina suenter l'autra. Il catschadur sa far tons siets d'exercezi sco quei ch'el vul. Dalla caussa anora beneventa Robert Brunold quella pretensiun: «Tgi che contonscha buca quei resultat ha piars nuot alla catscha. Dall'autra vart ei quei obligatori in pensum dapli per



Tgi che contonscha buc il resultat da sittar fixau obtegn buca pli la patent a catscha.

FOTO H. HUONDER

l'uniun cantunala e las secziuns, vul dir lavur supplementara.» Dapresent vegn realisau in inventari dils stans da sittar che stattan a disposi-

ziun pigl'exercezi dil tir da catscha. Tut en tut quenta Robert Brunold ch'ei setracti da rodund 50 egl'entir cantun Grischun. La reglamen-

taziun nova vala gia per la catscha vegnenta.

➤ PAGINA 3

Negina patenta senza haver tucchau la noda

Da niev ston ils catschadurs cumprovar cun in resultat lur habilitads da sittar

DA HANS HUONDER / ANR

■ **Tgi che vul serender alla catscha egl avegnir sto buca mo documentar ch'el hagi sittau en la buis, mobein ch'el hagi era contonschiu il resultat fixau al stan da tir. Per las stentas che sedattan cheutras vegnan las secziuns da catschadurs indemnissadas.** Avon rodund diesch onns ha il cantun Grischun introduciu l'obligaziun da sittar en persunalmein las buis da catscha. Avon che saver retrer la patenta ston catschaduras e catschadurs numnadamein serender el stan da tir per examinar schebein la buis ei drizzada aschia ch'ella ademplescha siu survetsch. In resultat vegn denton buca pretendius. Ussa semida quei. Mintga catschadura e mintga catschadur sto cumprovar sias habilitads da sittar e quei ton cun la buis da catsch'aula sco cun la buis da catscha bassa ni catscha da laghetg. Las pretendiuns sebasan sin la legislaziun cantunala, vul dir l'ordinaziun da catscha guvernamentala.

In resultat minimal

Catschaduras e catschadurs che vulan retrer egl avegnir la patenta da catscha ston sittar cun la buis da catsch'aula silmeins quater siets in suenter l'auto e quei minimum el dad otg sin la schiba dil camutsch. Quei ha da succeder cun ina da sias buis da catscha, la posiziun ei libra. Il diember da siets d'exercezi ei buca limitaus. Medemamein sa



Catschaduras e catschadurs grischuns ston mussar egl avegnir ch'els tucchan la noda el stan da sittar. Quels che contonschan buc il resultat minimal obtengan buca la patenta da catscha.

FOTO H. HUONDER

il catschadur sittar il program entochen ch'el contonscha la pretendiun. Il responsabel pil tir enteifer l'Uniun cantunala dils catschadurs da patenta dil Grischun, *Noldi Tiri*, ei perschadius che quei resultat duess esser contonschibels d'in e scadin. Quei di el ella davosa ediziun dil Catschadur grischun. Per il cau digl Uffeci da catscha e pesca dil cantun Grischun, *Georg Brosi*, ei quei resultat minimal ina obligaziun. «Nus stuein esser percharts dalla gronda responsabladad etica dalla catschaduras e dils catschadurs. Quellas e quels che contonschan buca quei resultat s'audan buc alla catscha», puntuescha el el Catschadur grischun. El ei perschadius che la gronda part dils catschadurs ademplescha senza problems quella pretendiun. Cun la buis da catscha bassa ston las catschaduras ed ils catschadurs tucrar quater gadas ina suenter l'auto la lieur rullonta. Era en quei tir ei il diember da siets d'exercezi buca limitaus.

Entgins pli pauc

Sin fundament dall'introducziun da quei obligatori da resultat al stan da tir quenta Georg Brosi cun ina reducziun da 100 entochen 200 patentas, quei oravontut tier la catscha cun ballins: «Duess quei esser aschia, sche astga quei buca disturbar nus. La responsabladad ei surordinada al giavisch da vuler far endretg a mintga catschadur.»

Tenor il cau digl Uffeci da catscha e pesca dil cantun Grischun ei quei resultat minimal da sittar buca mo corrects, mobein era ina necessitad absoluta per aschia tener quen dalla aultas pretendiuns dalla catscha: «Quei vala era per la catscha bassa e la catscha da laghetg.» La controlla dils resultats surprendan las secziuns da catschadurs, respectivamein ils fravis da buis che disponan sez d'in stan da tir. Persuenter exista ina cunvegientscha denter l'Uniun cantunala dils catschadurs da patenta dil Grischun ed igl Uffeci da catscha e pesca dil Grischun. Ils cuosts generals per quella cumprova da sittar surpren il cantun, medemamein las expensas per ils cuors dils responsabels en mintga stan. Las secziuns obtengan 15 francs per mintga cumprova da tir che sto vegnir pagada dil catschadur sez. Tenor il Catschadur grischun procura l'uniun cantunala ch'ils stans da sittar vegnien controllai periodicamein digl offizier da tir federal. Davart las cumprovas sto vegnir menau ina gliesta. Il material persuenter vegn furnius dall'uniun cantunala allas secziuns. La cumprova da sittar pils catschadurs grischuns ha dil reminent vigur svizra. Catschaduras e catschadurs che van alla catscha en auters cantuns ni egl exteriur duessen copiar la cumprova da sittar, pertgei igl original vegn retratgs dalla survigilonza da catscha quei mument che la patenta da catscha vegn acquistada.